



Округ вошат па районат кусяйт яха уйтантысат

Там лапатан Дмитрий Артохов округ вошат па районат кусяйт пидан уйтантыс. Хоты куртлуд хорамаңа верты, муй хорпи юхатан омасты, хоты йиңк па тут шавиты верат туңмалты, муй хорпи нётапса Волновахской округа верты, потар манас.

«Округ вошлуд па куртлуд хорама юхатан омасты, сит ям вер. Тут симась юхат пирыты мослат, хойтат муң улты тахайлува рахлат. Си вер пидан Уральской унт технической академия учёной хоятат рупитлат. Хасям тал унты нэпекат лэсятлат, хоты па муй сирн си рупата туты. Там хатла Пуровской районан мет ар юх омацца па куртлуд мет хорамаңа версайт», – округ пресс-служба ясаң элты.

Вошатан па куртатан йиңк па тут шавиман тайты мосал. Кашң хотан си вер кеша, шимал посатты хошап лэсятла. Там тал сис лапатъяң молтас тонна пормас Волновахской рай-она туса. Хот омасты хоятлуд там хатл унты сита рупитлат. Округ хоятат СВО хося улты па Курской область хоятата нётапса акатлат па китлат.

«Там товийн округеван улты кашң воша па района партапса



верса, Волновахской районан улты атэд курта нётты. Си пора сис ар рупата верман ус. Муң уятлуд, муй тахаятан муй хорпи рупата холна мосал. Сисан, муйн, иса нётлалуд. Щёхар тылсас олаңмет хатл унты кашң ашкулдая па ай няврэмат яңхты хотата мосты пормасат тусув», – округ кусяев ясаң верас.

Альбина Тырлина ханшам потар

Хор: vk.com/popovolegshur

Вуды хот маты нётапса ялаптада

Округ куцаев «Вещкат юш» хуват яңхмалдан, Пуровской районан «Чумовой капитал» нётапса элты потар манас. Лув ясаң мас партапса маты, там ван кутан утхот нэпекат ялап щирани ханштыя.

ЯНАО законодательной собрание хоца рупитты хоятат ин щи нётапса рупатая вусэд па утхот нэпек ялап щирани ханшса. Маты отал 2025-мет тал элты юр тайты питал.

Елпи, 2021-мет тал элты «Чумовой капитал» мийдыса хун айлат хотгэл хоятат худмет няврэмед сэма питал, муй па худмет няврэм энмалты вудат.

Ин па щи нётапса маты питла хун, хотгэдан кимет няврэм сэма питал, муй па энмалты айлат хотгэда кимет няврэм вуда. Нётапсая маты пормасат муй арат мийдыса, щи арата хащал.

Зоя Куртямова ханшам потар



Хор: Зоя Куртямова

Охлад ёхлы сохаптадайт

Вузатан уталтыты няврэмат, хой аңкидаласидал тащан яңхлат, уталтыты сис сохаптаты охлад, округ элты ёхлы сохаптадайт. Академической отпуск тут тайты ант мосал. Субсидия охал кашң тал маты питла.

Няврэм, аңкел-асел, уталтыты тахайл пидан договор нэпек лэсятлат. Охлад ван хатлап тылсас олаңмет хатл унты уталтыты тахайлада китлайт. Уталтыты епта-тыйн, шоши мир ёх няврэмата округеван хулам тал рупитты мосал.

Вузатан яма уталтыты округ няврэмата симась нётапса, ярсот сёрс солкувайн

ёхлы сохаптадайт. Льготной категория луңтасты эвет па похат – нийдъяң сёрсан, СВО хося улты ёх няврэмалд – катсот сёрс солкувайн мадайт.

Там тал элты ашкулдайн уталтыйм няврэмат, хой хон мув олимпиадаятан нох питсат па елды вузата уталтыты мантсат, ситат катсот педа ветъяң сёрс солкува субсидия ох ёша паятлат.

Ай тахайт потты тылсас ветхосьяңмет хатл унты, улты тахайн рупитты департамент образования луң сессия нэпекат китты мосал.

Альбина Тырлина ханшам потар

СВО улты хоятат нётасайдал ялпитсайт



Округ кусяев Вещкат юш манам порайн, си нётасайт элты ясаң верас. СВО хося улты хоятат яммалтыты сертификат па манты юша сохаптаты охат элатсайт.

Яммалтыты сертификат 120 сёрс элты 150 сёрс солкува унты энмас. Санаторияйн сютсаяты па леккар хотатан яммалтыты щира лувилал посатты рахал.

Холна йи ялап нётаспа лэ-сятса. Ин ляль манты харан улты ёх имидал пидан санаторияятан сютсаяты верытлат. Хоттэл хоятат хуламсот сёрс солкувайн мадайт.

Хой си едпийн сертификат нэпекат вуйдысат, хольмаң сёрс солкувайн сохаптадайт. Нэмолты нэпекат ханшты ант мосал. Си охат элты холна 150 сёрс солкувайн нётлдайт, хой ийимел пидан реабилитация манал. Туп заявление нэпек ханштты мосал.

Округеван яммалтыты сертификатат 2022-мет тал элты мадайт. 195 хоят си нётаспа шитсат. Манты юш сохаптаты охат ветгьяң сёрс солкува унты элатсайт. Си нётаспа йи тал кат пуш ёша паятты верытлат. Ант рупитты хоятат, хой няврэмал сютсаяты тахая тулды, кат хоят ураңан хутгьяң сёрс солкувайн мадайт.

Округеван улты няврэмат, хой асидал антом округеван контракт нэпекат ханшсат па хоятат округеван ант улдат, ин уталтыты ураңан лутты пормасат, автобусан ох ант сохаптаты па сютсаяты тахая яңхты юшад ветхосьяң сёрсаң электронной сертификатан сохаптаты верытлат. Округев хуват СВО хося улты хоятат ураңан хутгьяң нётаспа лэсятман ул.

Хасям лапатан Лорвош районан «Живые традиции» манам уйтан-топсайн, касапсаятан нох питам Мужи вош хоттэл, СВО вер педа шитам охлад китсалдал.

«Ориентир: Ямал» проект хуват рупитты ёхатлат

Уталтыты етшам няврэмат «Ориентир: Ямал» проект хуват рупитты ёхды ёхатты верытлат. Пулцават, Лапатнақ, Надым вошата па Пуровской, Тазовской, Ямальской районата няврэмат уталтаты ёх, воспитатель, нови тут па ох лунатты па нови тут пидан рупитты хоятат вохсайт.

Хоятат «4» па «5» поса аш-кудайел етшаптасэл па очной сирн елды уталтыдат, си проект хося пидтасьты верытлат.

«Муң симась няврэмата нёт-луд: портфолио па резюме лэ-сятлуд, рупатайн каншлаллуд. Си тумпийн, уталтыты сыс нёт-лаллуд», – Лапатнақ вошан «Хон мувеван рупата» («Работа в России») центрэн кусяя улты нэ Жанна Дятченко ястас.

Там порайн, велси уталтыты етшам няврэмат рупатая шеңк ант вудайт. Сишан там проект хуват лувилала кеншак рупата уятты. Там проект 2021-мет талдан этас. Хутгьяң педа няд энамты ёх рупатая вуса. Ёхды рупитты ёхтам няврэмат одаң хатл элты северной надбавкайн па сот сёрс солкувайн мохты сохаптадайт.

Альбина Тырлина ханшам потарқан

Тащат воштаты кеншак питад

Тащат карты юш мохты воштаты ин кеншак питад. Луңан Обская-Бованенково карты юш хоца кат щимащ хар лэщатса. Одаң юшад Луңхатгёхан 73-мет километрайн ул, кимет юшад – Халяталбей хоца, 82 километрайн, ёхан вуншты норам пуцадан.

Лэщатам юшат кеван па хишан шошамп-сайт, вулэң ухлат хуңхты па юшел вуншты ат верытсат. Ухлат ил ант рохняпты ураңан, рельсат кутапан павартат понман улдат. Тащан яңхты ёх ястам тахаятан щи юшат версайт. Аратадан 38 щимащ юш верты мосал.

Юшат верты тахайн ООО «Газпромтранс» Ямальской филиал рупитал. Ямал губернатор Дмитрий Андреевич Артюхов партам щирэн, там рупата елды тула. 2023-мет талдан, хун лув вуды хотата яңхас, щит элты тащ хоцаң улты хоятат пидан потрэмийс.

Аллина Тоярова ханшам потар



Хор: Vladislav Rummyatsev/Shutterstock/Fotodom

Вош омпсам емаң хатл

Кашң сус, округеван, ун вошат, ай куртат вош омпсам емаң хатлат постадат. Щёхар тылащ ветхощъяңмет хатадан тамащ емаң хатл Канащ куртан верса.

Ун Ас питаран дойты хорам ай куртые йис порайн омасман ус. Катра пора элты ин там хатлат унты куртаң хоятлад худ велпасламан



Хор: Зоя Куртямова

удлат, вонщамотат акатлат па ханты улапсаел шавилат.

Емаң хатл постама хатадан, вошаң па мойң хоятат природно-этнографической комплексан давалсайт. Тынасты харат дарпитсайт, каш алыты хоятат арысат, яксат па мойң хоятат ёнтты хущсат. Даңхапса тайты хоятат, ур хотатан, вератты харатан лэщатсайт. Катра щирани верам ханты лопасата, ампарата доңтыты рахас, вой сохат, велпаслаты пормасат вантты па ёшан кетамты, ханты сохат нох думатты па хор вуты. Сам вохтыйн, каврам шай па эплан

хошгыйңк йинщты рахас, маваң нянят, мампащат, вонщамотат лавематы.

Щутщаты харан Надежда Айховна Перчеда пидан еша потрэмисам. Лув Харсойм курт элты ёхтас па емаң хатл элты каматса ясаң ястас:

«Тамащ емаң хатлат улдытэлан ма иса ёхтылдыам. Каш верты хар вантты, ван рутлам пидан уйтантыты. Там пуш шеңк ар няврэм каш верты харан арыйс па якас. Дыпеман щикем аматлам. Ант елэмламан ханты, саран, ур сохан думатдыман усат па рут ясаңдалан арысат.

Щит хоты шеңк ям вер. Ванта, щиты щи ясёв елды тула, нумман тайты питла.

Вошаң хоят па ар ус. Лув кутэлан ванта ар хоят, хоятат па муват, вошат элты округева улты ёхатсат. Муң мувева улты ёхатсат ки, ханты улапсаев, верат иса ат уятлат па няврэмдал уталдат. Тамиты щи, яха пилтащман, каш хар яха верман, елды улты мосал. Канащ куртыев елды ар нупат холна ат дойл па энамал, хоятлад вещьката па тумтака ат улдат».

Зоя Куртямова ханшам потар

«Рут ясаңан потарлув»

3+

Хон мувев хуват кимет пуш онлайн щирани манты «Рут ясаңан потарлув» нёхты хор касаспа верла. Худам тал элты ярсот худам тал доват унты хоятат касаспая доңты верытлат.

Щёхар тылащ хутхощъяңмет хатл элты тылащ етшаты унты нёхты хор касаспа манты питал. Хор китам кашң хоят, ишакты нэпекан юканти.

Касаспа шеңк лаварт антом. Йи хоята, ал па каматса хоятата яха пилтащман ван нёхты хор лэщатты мосал, хота ханты ясаңан молты потар потарлаты. Щалта социальной сеть ВКонтакте понтыя па #говорю_на_родном_языке хэштег ясаң ханштыя. Па хоятата вантты ураңан, верам хорат ат нылайт.

Пирыты рупатайт щёхар тылащ хольмаң педа худмет хатл элты хольмаңмет хатл унты видеобоман ванталан па сама рахты рупата посан поналан. Нох питам нёхты хорат ай тахайт потты тылащ олаңмет хатадан социальной сеть хоща ванталан.

Там айкел, руц ясанган, социальной сеть ВКонтакте «Лух Авт» страницайн понман ул, щита рахал луңатты.

Мосмаңа тайты ун ими



Хор: <https://t.me/saka189>

Хащам лаптатан хон мув доватан вошаң па куртаң емаң хатлат постасайт. Щи порайн волаң вер верам хоятат мойлаптасайт. Кев сыд районан постыйм порайн, уна пелка ювам имев, Екатерина Андреевна Климова мойлаптаса.

Екатерина Андреевна 88-мет тал довата йис. Полуйской нюротан сэма питас. Ай порайн аңкыды-ащыды хащас, рутладан энмалса, ашкудайн ант уталтыйс. Шушты питмал вуш элты, иса хотаң хоятлада

нётас. Мет олаңан худ велпасдыс, юхат 1976-2003-мет талатан Байдарацкой совхоз тащ пидан нюротан хуват касдыман яңхас.

Пенсияя этмал юпийн похлад пидан касдыл, лув хоттэллада нётал. Иван Афанасьевич ийикел пидан лапат няврэм энмалсаңан. Ин Екатерина Андреевна Белоарск куртан ул. Хольмаң педа нял хилы па хутхощъяң хилы няврэм энмалты нётал.

Луң порайн хоттэл хоятлад пидан Харсаиман улдыйл, сус порайн, хун вулэт вана касдыты пораел ёхатал па тащ хота манал. Щита лув похада нётал, хошам па хорамаң ханты мир сохат ёнтал.

Екатерина Андреевна Климова хоттэл хоятладан шеңк самаңа тайла. Лув улапсайл антом кен ус, туп ищипа вещьката, лащкам самад ултал хуват тулды. Па хоттэл хоятат ищи щиты ияха ат улдат, ханты мир улапсаел елды ат тулат.

Аллина Тоярова ханшам потар

ОБЪЯВЛЕНИЕ

СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ **8(902)81-6-11-90**
ЗВОНОК ПО РОССИИ БЕСПЛАТНО

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА
5 000 000 Р
ЕДИНОВРЕМЕННАЯ ВЫПЛАТА
2 300 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период оформления проживания в г. Салехарде бесплатно, 3-х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

1 900 000 Р ЕДИНОВРЕМЕННО ОТ РЕГИОНА
До 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОЦИАЛЬНОГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

РЯДОВОЙ ОТ 210 Т. Р
СЕРЖАНТ ОТ 232 Т. Р
ПРАПОРЩИК ОТ 292 Т. Р

Уштам вуды сорашак уйтты ураңан

Щёхар тыдащ нядмет хатл элты хольмаң педа нядмет хатл унты Хон Петра вош элты ёхтам учёной хоятат вуды тащан рупитлат. Российской академия наук Тюменской научной центр Ямальской опытной станция хоца постап рупатаел тулэл.

Аратад мув доватан турам-сот ялап верат мандат. Ёшан тайты войт посан пондайт, вурдал вуйдылайт, арталдылайт. Ин па муй хорпи верат вуды тащан верлайт, щит элты сельскохозяйственной наука доктор Александр Александрович Южаков каматса ясаң ястас: «Муң ин талаң тыдащ Ямал муван рупитлув. Мет олаңан сора кеша тащ хота яңхсув. Кат хатл юша манас, па хулам хатл тащ хотан усув. Кат доктор, кат кандидат па Ямальской опытной станция куца Максим Александрович Максимчик.

Муңев мосас вуды тащ арталаты па вантты, хоты искусственной интеллект рупитты питад. Вуды хорас пидан рупитты питад муй па антом. Мосас сот вуды хора вуты, щалта специальной программа онтасан вантты, луңтасты па моштаты кашң вуды питда муй антом.

Ертаң хатдата ювантыйс, хулам хатл ерт щёшийс. Хатл ким этап юпийн рупатаев елды па версэв. Туп нядъяң вуды хора вусув, щалта па ертаңа йис. Актащсув па Лапатнаңка



Хор: Александр Южаков



Хор: Александр Южаков

мантсув, щита холсув, щи юпийн Пулңавта ёхтаптысув.

Хулам хоятэв Хон Петра воша манас, там лапатан па хулам хоят щилта ёхтас. Елды па рупатайт ищи верлув, ищиты Филипп Александрович Тайшин хоца. Ин лув тащад пидан Ун Ханмей ёхан хуват Харп педа касдыман яңхал».

Тамаш рупата онтасан, мосаң елды хатлатан, кашң тащан вулэт хора вуты питдайт. Йи веран ям, уштам вуды программа онтасан валэмада, мохты моштада, па уштам хоятада ёхлы мада.

Аллина Тоярова ханшам потар

Аңкилы-ащилы хащам шоши няврэмат нётлайт

Там хащам ятан номас понтса, Ямал муван улты Овс мув шимлаң няврэмат, хой аңкилы-ащилы хащас, ялап нётопсайн маты. Ялап тала питты вуш элты, хой касдыман яңхал, иса мосты пормасан маты питад.

Энамты няврэмат верытлат хольмаң педа кат пормас нэм ёша паятты. Хот лаңкты ураңан нюкийн мадайт, улатан, куран, нуйн, холап пормасатан, портунаң даращан, спутниковой телефонан, нови тут маты хошапан, юх эватты картыйн па па мосты пормасатан. Ин касдыман яңхты няврэмат туп улатан, нюкийн, куран па хольмаң вудыйн мадайт.

Ялда этты законопроект онтасан энамты няврэмата кеншак питад касдыман яңхты. Щи тумпийн электронной сертификатан мадайт, щи онтасэлан хольмаңкем вуды лутты верытлат. ЯНАО няврэмат сайдаты щиран рупитты департамент куца



Хор: Pinterest.ru

Александр Крашенинников ястас: «Тамаш нётопсайн кашң хоят электронной сертификат онтасан лув верытдалды пириты, муй хорпи вуды лувела мосад. Щи кеша улты организациятан па предприятиятан вудыдал лутдалды. Ин вулэт

муниципалитет хоца мадайт. Ант вантда муй хорпи, ант пириман лакки ортлайт».

Нийлхус тала ювам эвет па похат нётопса вуты верытлат. Туп касдыман яңхты мосад. Па хоята нётопса ел маты ант рахал. Там хатлатан нядъяң нётопса рупитал. Тащ хотаң ёх мосты пормасатан иса мийдылайт. Хой хонна ант вуйдыйс, мосад утхота яңхтыя.

Няврэмаңа йиты хоятат ищи чумовой капиталан мадайт. Ин кимет няврэм сэма питтыйн маты питад. Ун тахаятан уталтыты няврэмат яңхты юшел сохаптада, стипендияйн мадайт, хот митадаты охел ищи ёхлы ёхатал.

Аллина Тоярова ханшам потар

Хур ханшты ашкола



Хор: vk.com/ugra-news.ru

Югра мўевн «В со-творчестве с Райшевым» немпи ашкола пўнша. «В со-творчестве с Райшевым» немпи нявремат па айдат ёх пата вэндтаты хяр округевн «Югорский авангард» искусства мирхот пурайн па Геннадий Степанович Райшев шэңат 90 ода ювмал пата верантсы.

Мирхот лыпат хойты тылащ 6-мит хатлән Ёмвошн олнитсы па лыпат хойты тылащ 20-мит хатл вэнтэ рэпитты питл. Вэйтантупсы щэ тэхийн манд: хур ханшты хэ Г.С. Райшев галерея-мастерская хотн – Югра мўевн

Государственной художественной музейн.

Интәм 400 вохты непек китсы, щит ашколаятн па колледжятн муи университетятн вэндтэйтты нявремат па айдат ёх. Щэ ашколая юхатты рэхл, онлайн щирн вэндтэйтты щир ищи вэл.

Вэндтаты хяр пурайн арсыр культурно-просветительской мирхотят лэщатлайт, щиты юхтум хоятят Геннадий Райшев верум вулаң верлад олаңан уша паватлэйт. Щит лекцияйт, экскурсияйт, вэндтаты хярят, интерактивной ванлтупсэт. Щэ тумпи хур ханшты хэ рэт кэртала яңхты щир вэл.

«Николай Пирогов» пэлыница елды рэпитл



Тәм одн юхан хўват яңхты тўтәң хоп 48 кэртән рэпитты питл. Округ ханнесхуятят «Здравоохранение» национальной проект унтасн мэдлийт.

Щэ хопн тохтурят, ультразвуковой па лабораторной диагностика леккарят па па арсыр мэшат лекшитты ёх рэпитлэйт.

Вэйт дор тылащн дыв Сэрханл района яңхсат. Мет олаңан Банний кэртән рэпитты питсэт. Щэ юпийн Высокий Мыс, Лямина па Сытомино кэртата мир вантты яңхсат.

Сэрханл вошн рўтыщаты тэхи омэсса



Сэрханл вошн 20А микрорайон хуша рўтыщаты тэхи омэсса. Тәм одн щэ тэхийн якты-ариты щэра тэхи, рўтыщаты пата омэсты тэхи версайңан, баскетбол па волейбол юнтупсэңан пата хяр лэщатса.

Щэ тумпи щата тэпәр вўщкаты щэра ларащят, омэсты пэсанят, хэтлуптаты щўңкят версайт па енумты утат омэссайт. Дыв лэңхадят щата 700 вэн юх па 200 вал юх омэсты.

Интәм щэ тэхийн «Жильё и городская среда» нацпроект хўват 80% рэпата етшуптасы. Интәм ханнесхэ шэшты эшат па нявремат юнты хяр омэссайт.

Югра мўевн сыстамтты щират

Югра мўв ёх юханят па дорят хоняңан мўв хярят сыстамтлэйт. Тәм товийн округевн иса вошатн па кэртатн «субботник» вер олнитды.

Щит «Экология» нацпроект мухты «Сохранение уникальных водных объектов» вер унтасн тэды. Ас нопатты тылащ вўш эвалт па лыпат тылащ вэнтэ тата 142 щимашч ақтупсы версы. Щив 9112 ханнесхэ мўевн сыстамтты щэра юхтас. Иха ки лўңатты, юханят па дорят хоняңан 119 километра мўв хярят тэпәр па нампәр эвалт сыстамтсыйт.



Йилуп ашкола рэпитты олнитл

Приобье вошн 300 няврем пата йилуп ашкола 47 процента омэссы. Щэ хот 2025-мит одн лыпат тылащн рэпитты олнитл. Ин омэсты хярн 63 хоят рэпитл.

Интәм дыв хот павэртят омэслэйт, вентиляционной щўңкят верлэйт, ишнет па лаңал омэслэйт. Щэ тумпи лыпийн нуви тўт па йиңк мэты щўңкят лэщатлэйт.

Йилуп хотн 14 класс вэндтэйтты питлэйт, щата 18 хот йит верды. Щэ тумпи щата нявремат лэматсухлад шавиман тэйти хот йит, спортивной па етхотят верты хярңан, нявремат рўтыщаты тэхи питл. Камн па футбол, баскетбол па волейбол пата хярят лэщатлэйт.

12 шурач квадратной метра луваттэийн йилуп кат нартупаң хот «Вэндтаты вер» национальной проект щирн омэсды.



Ма ханшам ясңем

Ханты хоятлүв кутан рут ясаңан монсят, луңтарат ханшты хоятат улдат. Лүв кутэлан Любовь Яковлевна Шульгина. Лүв курк тыдасян одаңмет хатадан Послов куртан Лорвош районан ханты хоттэдан сэма питас. Асең шуңат худ-вой ведты хоята ус. Аңкел шуңат мис пусман рупитас. Любовь Яковлевна Пулңават вошан ул. Кат эви энмадтас, кашң лув семьяйт тайл. Любовь Яковлевна луңтарат русь па ханты ясаңан ханшал. 2008-мет талдан Пулңават вошан «Ма ханшам ясңем» нэпекал этас. Там лопасан лув ханшам луңтардал понлүв.

Улапса

Улапса? Улапса?!
Век удман
Инцасман яңхлүв.
Муй щирн улты?
Щи мутра
Ясаң ат тайл.
Щит ат па хатл,
Щит нэ па ху,
Щит мосты вер,
Па ликащты щир,
Ёхатлат,
Манлат,
Щит тут султам...
Щит шиваң юшдал
Тата манлат,
Ай тутан хутлыман,
Нохды этлат.
Век удман,
Нох ляксыман,
Муев яма верман,
Мира хойлүв.
Мир шукатман,
Патлама питлүв.
Си юр тайман,
Ай верлүван
Нох шукатлаюв.
Парман,
Лылэв па юш кашл...
Муй арат хатл сыс манад?
Уштам тут султамдал
Лүвела ханыдылат.
Щи порайн инцапса ат этал,
Иса удман лув питал!



Хор: Альбина Тырлина

Пулңават

Пулңават
Ям вошием!
Муй арат ёхан
мостыман тайлэн?
Муй арат ясаң?
Мохты нопса
Ясңат этлат.
Нарсаң юшат,
Йиңктай манам,
Тутаң хоп.
Ат дарыман, якман,
Ястатэм манад.
Волаң вошием,
Ям вошием.
Ным Овс муван
Верам вош.
Йит, уча, одаңан,
Муй арат уча,
Муй арат одаңан,
Муй арат йит,
Вошием тайл.
Щит элты нумадмиман
Ёращты лаңхалайн.
Ным Овс муван,
Лонцаң кутн,
Хота куцман полдат
Ларңилтыман вотат.
Овс мув шуван
Такан потман,
Юрлүв этлат.
Волаң вошием,
Ям вошием
Наң мувен,
Овс мувен
Емаң шуват,
Хошамтаты
Мира манлат.
Ям вошием,
Ким шошамталаман

Муң марэмлав,
Амтап, няхлүв,
Полуй, Шайтанка
Ёхан йиңкатан
Ел ат овидат,
Аса манлат,
Щараса этлат.
Муй щирн ёрамилэв
Овс муев катра верат,
Вошием верат.
Ям вошием,
Яха щи энапсаман,
Аялта пирщамисман,
Нёмшая шувана манман.
Па щи сэма питсаман.
Тампуш хорпийн,
Хорам хотат верман,
Арсыр оляпан
Елды ныдайн.
Пулңават,
Ям вошием,
Ным Овс муван верам
Олаң вошием!

Ма ханшам ясңем

Нови вотас хорпийн
Ларңилтыман тутлыдайм
Ант худдыйм нарсе сыйт
Тата щащидылат.
Лонц рав нови охшам иты,
Кашды-пушды лаңкра олаң.
Аматман, якман ларыдам,
Ухал ермак щашканатан
Понаслэм
Ешак самаң ясңат
Ёхлама китыдыдам.
Аматман якман карыдыдам,

Холап лаңкра пондам,
Нялйин певаддам,
Сыстам лор элты
Умащ ясңат моцатдам.
Аматман, якман ларыдам,
Ат худдыйм нарсе сыйт,
Тата щи щашлат.
Нови лонц равийе,
Васы пун иты,
Манэм лув лаңкаслат,
Емаң ясаңан,
Емаң уламан

Улапса — сит Ас...

Улапса и Ас сит си
Турам найн мойдасаюв! ...
Ун асилүв ситы потартысат.
— Асэн муй сирн
Сэма питас,
Муй сирн сяраса манад.
Яңха Ас юшан
Нохды, Алтай кев мува.
Илды, хота мув етшал...
Щи порайн уятлэн улапса.
Улапса, Ас хорпи —
Сэма питал,
Турма манад,
Сялта па сэма питал.
— Ун опрасьлүв
Ситы ястыдысат

Умась симась луңтарат луң-
атты. Ханты хоятат, хой мон-
сят, луңтарат, арат ханшлат,
муцева ханшаты, китаты, муң
лувидал газетайн понлүв. Мосаң
молты порайн нэпека понлайт.
Хоты там_мосванан ус. Ханты
хойтлүв, хойтылүв муң уят-
сув, хой луңтарат муцева ки-
тыдысат, рупатайдал акатсув
па Белорусь мува китсув. Сита
«Овс мув ханшты хоятат» нэпек
лэсятса. Нэпек эсалты ураңан
ар ох мосал па уятты мосал,
хота лүвидал этты ураңан
лэсятлайт.

Альбина Тырлина лэсятас



Хор: Альбина Тырлина

Ёхан Мув Ики па Ас Мув Ики

Хор: Луиза Млффакова



(Йис потар)

Кат ики лэңкеңан улдаңан. Йи икел Ёхан Мув Ики, кимет отад – Ас Мув Ики. Улдаңан. Хув вуш элты йи куртан усңан, ван вуш элты йи куртан усңан, муй па йи куртан энамсаңан. Ын йи аңки тайм пох мортаң улдаңан, йи аси тайм пох мортаң

улдаңан. Имидан иситы улдат. Эвен-похен улдат, яха ёнтлат, яха улдат, йи тухал ёхлад пела вевтам потар, вевтам ясаң ант ясталат. Иса яма улдат.

Имолтыйн йи икел ястал:

– Па лув иса йи ёхан курт лыпеманан холта унты улдаман, холпеда унта яңхламан! Йи икел щикүш кашдышак ус.

– Я, яңхламан ки, яңхламан!

Унта си мантсаңан.

Унта мантсаңан, номас муй вуша понтсаңан, манам молты вушана ёхатсаңан.

Си шушидыты питсаңан: яңхсаңан, яңхсаңан, йиңқаң пелак кератсаңан, унтаң пелак кератсаңан.

Си кутан йи ики лэңкел нёхас си ведас. Па хот хара мантсаңан, хот хары версаңан. Хотдан мунты хуван хайсалдан, хопан муй вуша ёхтам унты. Хот хар версаңан, лэсңан, йинцсаңан. Йи ики лэңкел молтэл уштал. Си каншал, си каншал Ёхан Мув Ики лэңкел.

Ас Мув Ики лэңкел ястал:

– Муен каншдан?

– Ма си морта, си ошды питсам па ин онас нёхтаты, актасьты питсаман па воем холпеда илды паятсэм. Йи нёхас лэңки вуйдысам, нёхсэм холты уштасэм.

Ин ики лэңки си каншал, си каншал, иса ант уйтдалды. Ас Мув Икел ястал:

– Иси па, иса уштасэн, манэм долмама си нумаслан.

– Ма па муй, яха щи усман, ем ант ул па наңен долмама ёвартты? Холта ил паятсэм. Ампа си ампа, ванты. Муя ястадам, муй па ампеман, мосаң, давемаса – сит нэмолты ант ястадам.

Па си хирантал, си каншантал. «Мосаң, тата паятсэм?» – нумасыйл.

– Анта, иси па манэм долмама си ёварлэн?

Йи икел патан пупи ансяр тувмал па порты си олдитсалды.

– Пупийн нулдамн! Пупийн нулдамн: наң иси матты манэм долмама си номас тайдан?!

– Анта, наңен долмама номас ант тайдам, щах ант нумасдам!

Йи икел иса ант кашасял. Я си, нултас, атад дылаң тэлан омассалды, хота воямтыса, муй хота антом.

Ситы кимет хатла йис, ёхлы си шушмас Ас Мув Ики. Шушмас, хопала манас, хопала лэлас па ёхи имел хося ант ёхатал. Манмал кут, патласа. Ин нёхас сохал лув тайдалды, мет лув долапсалды. Нэман пупи пилн вура верас. «Ин си, нумасал, – ванты, ёша паятдайм!» Сит патын си ёхи хонтал. Си манас, си манас, муй вурн холты?

«Ин си ёхатдайм атадан», – нумасал. Юх элты молты картэл верас. Картэл верас па сядта хопал си ярас па нормал элтыя сий олас.

Ин хатл ханьл пела питас, ин икел вуталта си йитал сясял, пупи икел. Пупи икел йиты питас па ин икел хопала лэламтас, елды довалмас. Елды довалмас, куш хонтал, ёлта ёхатты си вуратла. Ов есялт кердал – йи икел вуталта сыхалн манал, ел пелак элты па нык навармал, па нюхалда. Куш нюхласыйс, нюхласыйс, имолтыйн новия йис, ин пупи икел унта шушмас.

Па манас (кимет хатл па ант ёхтас), йи симась картэл па си верас. Ванты, сорам муван ул, си войпла. Пупи икел вуталта йис, ин ики па си хопала лэламтас, ел довалмас ики лэңки. Ел довалмас, па си хонтаты питас. Эсса йиңқан куш манал, си манал, ёлта ёхатты си вуратла. Ов есялт кердал – ин икел намалта усман пунаң кувсяң ху овн лэдла, ёхи хасял. Па вуты киламтал, вуталта, ел пелак элты, пан хуват манал. Ситы нюхласысңан, нюхласысңан кутанан, хатл новия йиты пела питас, па пупи икел кеныман, умыман унта си шушмас.

(Елды па ул)

Семён Михайлович
Лозьямов монсильис

Пулңават вош емаң хатдал

Там сютсяты хатадан Пулңават вошев емаң хатдал постас. Хасям талатан си уйтантапса шеңк яма верда па ар тахаятан манад. Куртаң па мойң хоятат ураңан арсыр программат, уйтантапсайт, вантопсайт па мастер-классат лэсятсайт, няврэмат кеша ёнтты харат дарпитсайт.

Хоятат городской сад эдты И.В. Корольков нәмпи одаң школа унты, Обдорский остроган па «Геолог» хар пуңадан сютсяты верытсат.

Камн ар тахайн лэсытам харатан па ур хотатан хошак па каврам шай йинсьты, эплдаң шоши мир лэвпасат давемиты рахас.

Емаң хатдан улам хоятат туңа сира сютсясат па ям номасан ёхи мантсат. Там лопсан сита верам хорат вантаты па умасьдыаты.

Альбина Тырлина
ханшам потар



Хор: Альбина Тырлина, Коллаж: Луиза Мифрахова

Газета «ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1340 Заказ 1347

Подписные индексы:
на год – ПА700, на полугодие – ПР561

№ 38 (1237)

Газета вышла в свет 21 сентября 2024г.
Подписано в печать 19 сентября 2024г.

по графику: 16.00

фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д.1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

Генеральный

директор
АНО «Ямал-Медиа»
Зулинова
Марья Андреевна

И.о. главного
редактора
Куртямова
Зоя Николаевна